

淨土五經一論



阿彌陀佛

九品咸令登彼岸



四十八願度衆生

淨土五經一論

河北省佛協慈善會

目 录

佛说阿弥陀经	……	姚秦鸠摩罗什译(2)
佛说大乘无量寿庄严清净平等觉经	……	民国夏莲居会集(14)
佛说观无量寿佛经	……	刘宋畺良耶舍译(121)
华严经普贤菩萨行愿品	……	唐般若译(165)
楞严经大势至菩萨念佛圆通章	……	唐般刺密谛译(200)
无量寿经优婆提舍愿生偈	……	元魏菩提留支译(202)

佛說阿彌陀經

姚秦三藏法師鳩摩羅什譯

如是我聞。一時佛在舍衛國。祇樹給孤獨園。與大比丘僧。千二百五十人俱。皆是大阿羅漢。衆所知識。長老舍利弗。摩訶目犍連。摩訶迦葉。摩訶迦旃延。摩訶俱絺羅。離婆多。周利槃陀伽。難陀。阿難陀。羅睺羅。驕梵波提。賓頭盧頗羅墮。迦留陀夷。摩訶劫賓那。薄拘羅。阿菴樓駄。如是等諸大弟子。并諸菩薩摩訶薩。文殊師利法王子。阿逸多菩薩。乾陀訶提菩薩。常精

進菩薩。與如是等諸大菩薩。及釋提桓因等。無量諸天大衆俱。

爾時佛告長老舍利弗。從是西方。過十萬億佛土。有世界名曰極樂。其土有佛。號阿彌陀。今現在說法。舍利弗。彼土何故名為極樂。其國衆生。無有衆苦。但受諸樂。故名極樂。又舍利弗。極樂國土。七重欄楯。七重羅網。七重行樹。皆是四寶周匝圍繞。是故彼國名為極樂。又舍利弗。極樂國土。有七寶池。八功德水。充滿其中。池底純以金沙布地。四邊階道。金銀。琉

璃。玻璃合成。上有樓閣。亦以金。銀。琉璃。玻璃。碑礫。赤珠。瑪瑙。而嚴飾之。池中蓮華。大如車輪。青色青光。黃色黃光。赤色赤光。白色白光。微妙香潔。舍利弗。極樂國土。成就如是功德莊嚴。又舍利弗。彼佛國土。常作天樂。黃金為地。晝夜六時。雨天曼陀羅華。其土衆生。常以清旦。各以衣祴。盛衆妙華。供養他方十萬億佛。即以食時。還到本國。飯食經行。舍利弗。極樂國土。成就如是功德莊嚴。復次舍利弗。彼國常有種種奇妙雜色之鳥。白鶴。

孔雀。鸚鵡。舍利。迦陵頻伽。共命之鳥。是諸
衆鳥。晝夜六時。出和雅音。其音演暢五根。五
力。七菩提分。八聖道分。如是等法。其土衆
生。聞是音已。皆悉念佛。念法。念僧。舍利
弗。汝勿謂此鳥實是罪報所生。所以者何。彼佛
國土無三惡道。舍利弗。其佛國土。尚無惡道之
名。何況有實。是諸衆鳥。皆是阿彌陀佛。欲令
法音宣流。變化所作。舍利弗。彼佛國土。微風
吹動諸寶行樹。及寶羅網。出微妙音。譬如百千
種樂。同時俱作。聞是音者。自然皆生念佛念法

念僧之心。舍利弗其佛國土。成就如是功德莊嚴。舍利弗。於汝意雲何。彼佛何故號阿彌陀。舍利弗。彼佛光明無量。照十方國。無所障礙。是故號為阿彌陀。又舍利弗。彼佛壽命。及其人民無量無邊阿僧祇劫。故名阿彌陀。舍利弗。阿彌陀佛。成佛已來。於今十劫。又舍利弗。彼佛有無量無邊聲聞弟子。皆阿羅漢。非是算數之所能知。諸菩薩衆。亦復如是。舍利弗。彼佛國土。成就如是功德莊嚴。又舍利弗。極樂國土衆生生者。皆是阿鞞跋致。其中多有一生補處。其

數甚多。非是算數所能知之。但可以無量無邊阿僧祇說。舍利弗。衆生聞者。應當發願。願生彼國。所以者何。得與如是諸上善人。俱會一處。舍利弗。不可以少善根福德因緣。得生彼國。舍利弗。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛。與諸聖衆。現在其前。是人終時。心不顛倒。即得往生阿彌陀佛極樂國土。舍利弗。我見是利。故說此言。若有衆生。聞是說

者。應當發願。生彼國土。舍利弗。如我今者。
贊嘆阿彌陀佛不可思議功德之利。東方亦有阿閼
鞞佛。須彌相佛。大須彌佛。須彌光佛。妙音
佛。如是等恒河沙數諸佛。各於其國。出廣長舌
相。遍覆三千大千世界。說誠實言。汝等衆生。
當信是稱贊不可思議功德。一切諸佛所護念經。
舍利弗。南方世界。有日月燈佛。名聞光佛。大
焰肩佛。須彌燈佛。無量精進佛。如是等恒河沙
數諸佛。各於其國。出廣長舌相。遍覆三千大千
世界。說誠實言。汝等衆生。當信是稱贊不可思

議功德。一切諸佛所護念經。舍利弗。西方世界。有無量壽佛。無量相佛。無量幢佛。大光佛。大明佛。寶相佛。淨光佛。如是等恒河沙數諸佛。各於其國。出廣長舌相。遍覆三千大千世界。說誠實言。汝等衆生。當信是稱贊不可思議功德。一切諸佛所護念經。舍利弗。北方世界。有焰肩佛。最勝音佛。難沮佛。日生佛。網明佛。如是等恒河沙數諸佛。各於其國。出廣長舌相。遍覆三千大千世界。說誠實言。汝等衆生。當信是稱贊不可思議功德。一切諸佛所護念經。

舍利弗。下方世界。有師子佛。名聞佛。名光佛。達摩佛。法幢佛。持法佛。如是等恒河沙數諸佛。各於其國。出廣長舌相。遍覆三千大千世界。說誠實言。汝等衆生。當信是稱贊不可思議功德。一切諸佛所護念經。舍利弗。上方世界。有梵音佛。宿王佛。香上佛。香光佛。大焰肩佛。雜色寶華嚴身佛。娑羅樹王佛。寶華德佛。見一切義佛。如須彌山佛。如是等恒河沙數諸佛。各於其國。出廣長舌相。遍覆三千大千世界。說誠實言。汝等衆生。當信是稱贊不可思議

功德。一切諸佛所護念經。舍利弗。於汝意雲何。何故名為一切諸佛所護念經。舍利弗。若有善男子。善女人。聞是經受持者。及聞諸佛名者。是諸善男子。善女人。皆為一切諸佛之所護念。皆得不退轉於阿耨多羅三藐三菩提。是故舍利弗。汝等皆當信受我語。及諸佛所說。舍利弗。若有人。已發願。今發願。當發願。欲生阿彌陀佛國者。是諸人等。皆得不退轉於阿耨多羅三藐三菩提。於彼國土。若已生。若今生。若當生。是故舍利弗。諸善男子。善女人。若有信者。

應當發願。生彼國土。舍利弗。如我今者。稱贊諸佛不可思議功德。彼諸佛等。亦稱贊我不可思議功德。而作是言。釋迦牟尼佛。能為甚難稀有之事。能於娑婆國土。五濁惡世。劫濁。見濁。煩惱濁。衆生濁。命濁中。得阿耨多羅三藐三菩提。為諸衆生。說是一切世間難信之法。舍利弗。當知我於五濁惡世。行此難事。得阿耨多羅三藐三菩提。為一切世間說此難信之法。是為甚難。佛說此經已。舍利弗。及諸比丘。一切世間天人阿修羅等。聞佛所說。歡喜信受。作禮而去。

佛說阿彌陀經

拔一切業障根本得生淨土陀羅尼

南無阿彌多婆夜。哆他伽多夜。哆地夜他。阿彌
利都婆毗。阿彌利哆。悉耽婆毗。阿彌利哆。毗
迦蘭帝。阿彌利哆。毗迦蘭哆。伽彌膩。伽伽
那。枳多迦隸。娑婆訶。

佛說大乘無量壽莊嚴清淨平等覺經

菩薩戒弟子鄆城夏蓮居（法名慈濟）會集各譯（敬分章次）

法會聖衆第一

如是我聞。一時佛在王舍城。耆闍崛山中。與大比丘衆萬二千人俱。一切大聖。神通已達。其名曰。尊者驕陳如。尊者舍利弗。尊者大目犍連。尊者迦葉。尊者阿難等。而為上首。又有普賢菩薩。文殊師利菩薩。彌勒菩薩。及賢劫中一切菩薩。皆來集會。